



Klub poslanika Naša stranka – Nezavisni blok

Broj:  
Sarajevo, 09.09.2020.

 BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

PARLAMENTARNA SKUPŠTINA  
BOSNE I HERCEGOVINE  
PREDSTAVNIČKI DOM  
n/r g. Nebojša Radmanović, predsjedavajući

PRIMLJENO: 09-09-2020			
Organizaciona jedinica	Klasifikaciona oznaka	Redni broj	Broj priloga
01-	56-7-	1797	20

Na osnovu člana 8. Poslovnika Predstavničkog doma Parlamentarne skupštine Bosne i Hercegovine, podnosimo

### POSLANIČKU INICIJATIVU

Nalaže se Vijeću ministara Bosne i Hercegovine da u roku od 10 dana od dana usvajanja ove inicijative otpočne koordinaciju sa nadležnim tijelima entiteta i kantona, s ciljem omogućavanja izučavanja nacionalne grupe predmeta svim učenicima koji to žele, upisivanja naziva zvaničnih jezika u Bosni i Hercegovini u svu školsku dokumentaciju u skladu sa nazivima navedenim u Općem okvirnom sporazumu za mir u Bosni i Hercegovini (Daytonski sporazum), te ukidanja svih drugih oblika diskriminacije u osnovnim i srednjim školama u Bosni i Hercegovini, a uzimajući u obzir međunarodne obaveze Bosne i Hercegovine.

### OBRAZLOŽENJE

U Bosni i Hercegovini trenutno vlada različita praksa kada je u pitanju izučavanje nacionalne grupe predmeta, upisivanja zvaničnih naziva jezika u školsku dokumentaciju u skladu sa Daytonskim sporazumom, te postoje i drugi vidovi diskriminacije u osnovnim i srednjim školama. Iako je obrazovanje u nadležnosti entiteta, odnosno kantona, činjenica je da je Bosna i Hercegovina preuzela brojne međunarodne obaveze koje zabranjuju bilo kakvu diskriminatornu praksu, te je pokretanje ove inicijative u Parlamentarnoj skupštini BiH, te insistiranje na koordinirajućoj ulozi Vijeća ministara BiH po ovom pitanju, u skladu sa Ustavom Bosne i Hercegovine.

Najnoviji primjeri dokazuju da je ovaj problem i dalje akutan u Bosni i Hercegovini. U Kantonu 10, u Glamoču, učenici srpske nacionalnosti nisu u mogućnosti pohađati nacionalnu grupu

predmeta, niti je omogućena nastava na srpskom jeziku. U općini Kotor Varoš, roditelji se nadaju izvršavanju sudskih odluka kako bi djeci bošnjačke nacionalnosti bilo omogućeno izučavanje nacionalne grupe predmeta, odnosno bosanski jezik. U drugim sredinama se u školsku dokumentaciju upisuju nazivi jezika koji nisu u skladu sa nazivima navedenim u Daytonskom sporazumu. Sve ovo dovodi do diskriminatorne prakse, a što na međunarodnom nivou dovodi do kršenja obaveza od strane Bosne i Hercegovine, odnosno do njene odgovornosti kao države.

Izjave roditelja iz Glamoča ukazuju da je ovaj problem neophodno institucionalno rješavati. Primjera radi, roditelj učenika kojima je onemogućeno pohađanje nacionalne grupe predmeta, odnosno nastave na srpskom jeziku, u izjavi medijima je rekao:

„Mislio sam da roditelji mogu nešto učiniti, ali to je nemoguće. Imao sam volju, ali sam shvatio da roditelji ne mogu ništa učiniti i da je sve stvar politike. Jednostavno se možemo razapeti u centar grada, svi mi roditelji, ali nećemo ništa postići. Zapravo, i ne trebamo da rješavamo to jer su nam Ustavom zagarantovana prava i neka to rješavaju političari”, smatra Radumilo i pojašnjava da problem srpskog jezika “može riješiti Milorad Dodik jednim pozivom Draganu Čoviću”.

Evidentno je da svi naponi roditelja ili ne mogu dovesti do rješenja ili traju predugo, a također je neprihvatljivo da se ovakva pitanja rješavaju telefonskim pozivima između lidera političkih stranaka. Izjave roditelja također pokazuju da je problem potrebno rješavati sistemski, na nivou cijele Bosne i Hercegovine, u skladu sa međunarodnim obavezama Bosne i Hercegovine. Primjera radi, drugi roditelj je u izjavi za medije rekao iduće:

„Spominju tamo neka sela kod Kotor Varoša. Kad ministar iz Republike Srpske njima dozvoli, dozvoliće i oni ovdje, priša Slobodan.“

S obzirom na sve navedeno, uključujući i činjenicu da se radi o pravima djece, kao i na samu hitnost ovog pitanja jer svako odgađanje rješenja stvara nepopravljivu štetu za djecu koja nastavljaju pohađati nastavu, te uzimajući u obzir ustavne nadležnosti koje se tiču međunarodnih obaveza Bosne i Hercegovine, potrebno je da Predstavnički dom naloži Vijeću ministara BiH da bez odlaganja otpočne koordinaciju s nadležnim entitetskim i kantonalnim organima s ciljem trajnog, sistemskog i ujednačenog rješenja ovih pitanja.

S poštovanjem,

Predrag Kojović

*Predrag Kojović*

Mirjana Marinković-Lepić

*M. Lepić*

Aida Baručija

*Baručija Aida*

Damir Arnaut

*Damir Arnaut*

Poslanici u Predstavničkom domu  
Parlamentarne skupštine Bosne i Hercegovine